

四庫全書

集部

欽定四庫全書卷

宋元詩會卷十三

兵部主事陳焯編

蔡襄

字君謨仙遊人舉進士為西京留守推官館閣校勘范仲淹以言事去國余靖論救之尹洙請與同貶歐陽修移書責司諫高若訥由是三人皆坐譴襄作四賢一不肖詩遠近傳誦進知諫院規切君過責備大臣一無鯁避聞者悚然俄直史館兼修起居注益任職論事多裨國體以母老求知福州改福建路轉運使復修起居注唐介忤宰相貶春州襄力爭之得改英州溫成后追冊請勿立忌併

罷監護園陵官三御史論梁適解職襄不草制帝
遇之益厚賜其母冠帔示寵遷龍圖閣直學士知
開封府再知溫州召為翰林學士三司使乞知杭
州拜端明殿學士治平三年丁母憂明年卒年五
十六贈吏部
侍郎謚忠惠

楊叔武北堂夜話

歲晏物景薄層陰向晚饒輕雲隱微月殘雪棲枯條夫
君有高適顧我慰寂寥瀟灑開北堂拂榻延良宵前几
陳古書坐見千載遙問亦發新句幽思含九韶神明靜
外照念慮醉中消揚雄戒丹轂顏子安一瓢良玉不火

變翠栢寧霜彫此心固獨往聲利詎得招

遊鼓山靈源洞

郡樓瞻東方嵐光瑩人目乘舟逐蚤潮十里登南麓雲
深翳落花樹暗迷幽谷朝雞亂木魚晏日明金屋靈泉
注石竇清吹出篴竹捫蘿躋上峰大空延眺矚孤青浮
海山長白挂天瀑況逢肥遯人性尚自幽獨西景復向
城淹留未云足

寄題滁州豐樂亭

君為滁上守，乘閒務幽尋。
羣從留山阿，美望窮前林。
良讌追佳賞，高亭曠遐臨。
烟雲無定姿，水石惟清音。
靜見魚鳥適，遙聞雞犬深。
時節屢豐有，民里無欺侵。
豈獨延衆物，因茲託冲襟。
大筆每絕唱，芳樽寧孤斟。
別日念已長，來期詎能今。
安得凌風翰，相從殫歲陰。

出東門向北苑路

曉行東城隅，光華著諸物。
溪漲浪花生，山晴鳥聲出。
稍見人烟川，原正蒼鬱鬱。

丙申秋過漁溪驛驛舊有梅數株嘗題詩記今無
有也

曾把蚤梅枝思君在別離別離雖云遠萬里終還期樹
枯根已撥人去復何之故館動秋色雲物藏寒曦清香
不可聞衰草空繁滋一夜平堦雨輾轉良自知

訪天台菴

幽人去未還門戶和雲閉亭午樹陰圓深冬泉響細寒
生羣蟲蟄清徹孤鶴唳寂寞傍山歸寫向滄溟際

留別舊居花檻

別意起中夕出門風吹衣側月光艷薄餘花香氣微清
尊歲相向欲去心有違殘葩勿盡放主人行亦歸

翠巖寺

攬蔓巖扃峻交繩寶界平斜峰約雲勢密樹起秋聲泉
檻妨蛩響霜樓助月明冥筌兼灑落警句一何清

夏晚南野

夏竹圍前檻涼襟析舊醒疊雲封日茜斜雨著虹明魚

動池開暈蟬移樹減清葭洲烟向暝鳬鶩自相迎

蕪陰樓上

野馬沈寒氣神禽度暖風斷霞天共紫斜日樹齊紅山口橫虛釣江隈跋遠蓬解窮千里目爭奈思無窮

和丘提刑聞新鴈寄度支

翔鴈來江渚秋容在遠空幾聲疎樹外一字斷雲中虛館垂簷月平舉敗葉風裁詩託幽思幽思更無窮

送別陳比部

全宋文卷之三
卷十三
祖向西郊道川原畫閣臨燒痕經雨活樹色入谿深斜
日明春態孤雲感客心何人知別意重把酒杯斟

洪澤阻風

今日風期惡遲迴一水濱村旗呈酒聖廟鼓賽河神躍
鯉曾驚網饑鳥不避人篙工時借問何處即通津

開州園縱民遊樂

風日朝來好園林雨後清遊魚知水樂蝶戲見春晴草
輒迷行迹花深隱笑聲觀民聊自適不用管絃迎

奉酬王知縣賞春不預以詩見贈

仙陬翠觀盡繁英
朱白相兼照眼明
池浸嵐光生晚碧
鳥驚人語斷春聲
談諧遽喜開懷久
骯髒終慙走筆成
佳致可能陶靖節
庭柯斜盼獨忘情

過天津橋

日暖溪平水漸銷
水聲纔下內前橋
山川滿眼閒宮殿
草樹迷人舊市朝
每向尋春偏有意
却成懷古更無聊
洛陽平昔多豪俊
惆悵埋魂不可招

宿延平津

鳴籟蕭森萬木聲
濃嵐環合亂峰青
樓臺矗處雙溪會
雷電交時一劍靈
曉市人烟披霽旭
夜潭漁火鬪寒星
畫屏曾指孤舟看
今日孤舟在畫屏

晝寢宴坐軒憶與蘇才翁會別

投涼下馬卧僧家
遶簟清風卷絳紗
脩竹滿前微雨過
遠山無際薄雲遮
武侯舊隱人應到
閩嶠孤城日自斜
解與塵心消百事
更開新焙煮靈芽

丙申五月遊興化西門上溪

尋谿偶過上溪遊
雨後溪渾水亂流
因傍堤松却飛蓋
為聞山鳥輟鳴騶
平田攏稜青雲合
滿谷芭蕉碧玉抽
開濟無功湏蚤去
故時瓜隴有通侯

和江上觀潮

地卷天回出海東
人間何事可爭雄
千年浪說鷗夷怒
一沸全疑渤澥空
寂靜最宜聞夜枕
崢嶸湏待駕秋風
尋思物理真難測
隨月虧圓亦未通

遣興

苦竹生筍四五寸櫻桃開花千萬枝
空濛野色常樓處索寞春寒帶雨時
已放清歌逐瑤管旋篳新釀行金卮
衰翁酩酊自為樂舉鞭不問并州兒

上巳日州園東樓

地上多于枝上花東樓凝望惜年華
潮頭正對伍胥廟燕子爭歸百姓家
粉籜漸高山徑筍綠旗初展石巖茶
流芳自與人兼老樽酒相逢莫重嗟

杭州璘上人以花數種見寄

名卉參差十數科，商船千里任風波。
土花分破根株小，春色隨來意緒多。
欲種更看移樹法，將開須用傍欄歌。
中年漸不勝杯酌，紅翠他時奈爾何。

陪尹子漸申安禮宿香山寺

二月已強半，尋春登石樓。
山光侵暮變，草色到雲休。
歸鳥沈巖際，行人過樹頭。
剝苔看石碣，因火認魚舟。
漸夜灘聲惡，憑虛屋勢浮。
乘閒聊自適，觴詠屬吾流。

宿漁梁驛

庭樹疎疎河漢低瓦溝霜白月平西
寒鴉不奈單棲苦落泊驚飛到曉啼

入天竺山留客

山光物態弄春暉莫為輕陰便擬歸
縱使晴明無雨過入雲深處亦霑衣

徐虞部以龍尾石硯邀余第品仍授來使持還書

府

玉質純蒼理綴精鋒鋌都盡墨無聲相如間道還持去
肯要秦人十五城

梅堯臣

字聖俞宣城人侍讀學士詢從子也工為詩以深
遠古澹為宗初用蔭官桐城主簿調河南留守錢
惟演見而嗟賞之歐陽修與為詩友自歎不及歷
德興建德襄城縣令監稅湖州大臣屢薦宜在館
閣召試賜進士出身為國子監直講累遷尚書都
官員外郎預修唐書未成卒有宛陵集四十卷

野田行

輕雷長陂水農事乃及辰茅旌送山鬼瓦鼓迎田神青

卑暗藏雉萬木欣已春桑間偶耕者誰復來問津

過開封古城

荒城臨殘日雞犬三四家豈復古阡陌但問新桑麻
頽垣下多穴所窟狐與蛇漢兵墮銅鏃青血為上花

寄靈隱通教僧

奇山青若洗草木生石上根萌不可窮條蔓自增王
其陰有高僧日食惟一盞世人久已疎猿鳥應相向

秋夜感懷

風葉相追逐庭響如人行獨宿不成寐起坐心屏營哀
哉齊體人魂氣今何征曾不如隕籜繞樹猶有聲涕淚
不能止月落荒雞鳴

陽翟縣城凝嵩亭

西北望嵩色憶上太室時陟彼已不淺坐此安能知誰
棲絕壁下但見前峰危正與曩未異目存迹焉追

追詠崔奉禮小園

前此訪君時已觀堂宇邃安知中屏開自有幽林致花

寒巖挂紅石，擘雲根。翠正當秋風來，不見搖落意。

夜聽鄰家唱

夜中未成寐，鄰歌聞所稀。想像朱唇動，髣髴梁塵飛。誤節應偷笑，竊聽起披衣。湏臾曲已終，牕月存餘暉。

寄題滁州醉翁亭

琅琊谷口泉，分流漾山翠。使君愛泉清，每來泉上醉。日暮使君歸，野老紛紛至。但留山鳥啼，與伴松間吹。

秋日村行

谿霧晝盡收山村夜初晦饑禽來往飛遠樹青紅碎原
上楚牛牧屋頭吳婦碓雞肥酒已熟野老邀同輩

彼鴛吟

斲木喙雖長不啄栢與松松栢木堅直中心無蠹蟲廣
庭木云美不與松栢比臃腫質性虛朽蝎招猛觜主人
赫然怒我愛爾何毀彈射出窮山羣鳥亦相喜啁啾弄
好音自謂得天理哀哉彼鴛禽吻血徒為爾鷹鷂不搏
擊狐兔縱橫起况茲樹腹殆力去且濱死

范饒州坐中客語食河豚魚

春洲生荻芽春岸飛楊花河豚當是時貴不數魚蝦其
狀已可怪其毒亦莫加忿腹若封豕怒目猶吳蛙庖煎
苟失所入喉為鏌鋇若此喪軀體何須資齒牙持問南
方人黨護復矜誇皆言美無度誰謂死如麻吾語不得
屈自思空咄嗟退之來潮陽始憚餐籠蛇子厚居柳州
而甘食蝦蟆二物雖可憎性命無舛差斯味曾不比中
藏禍無涯甚美惡亦稱此言誠可嘉

田家語

庚辰詔書凡民三丁籍一立校與長號弓箭手用備
不虞主司欲以多媚上急責郡吏郡吏畏不敢辦遂
以屬縣令互掇民口雖老幼不得免上下愁怨天雨
淫淫豈助聖上撫育之意耶因錄田家之言次為文
以俟採詩者云

誰道田家樂春稅秋未足里胥扣我門日夕苦煎促盛
夏流潦多白水高於屋水既害我菽蝗又食我粟前月

詔書來生齒復版錄三丁籍一壯要使操弓韞州符今
又嚴老吏持鞭朴拶索稚與艾唯存跛無目田間敢怨
嗟父子各悲哭南畝焉可事買箭賣牛犢愁氣變久雨
鐺缶空無粥盲跛不能耕死亡在遲速我聞誠所慙徒
爾叨君祿却詠歸去來刈薪向深谷

冬雷

上帝設號令隱其南山下震發固有時曷常事憑怒春
以動含生夏以奮風雨冬其息不用藏在黃厚土我今

來江南歲歷惟建午如何小雪前向曉疑鳴金蛟蛇龜
蟲厄鱗裂口塊吐蝦蟇不食月深窟僵兩股天公豈物
欺若此汨時序或言非天公實乃陰怪主嘗觀古祠畫
牛首椎連鼓黑雲雜狂飈相與為肺腑是不由昊穹安
能順寒暑吾因考厥事復以驗莽鹵市井欺量衡定知
不活汝元惡逆大倫弗加霹靂斧此豈曰無私故予未
所取必恐竊天威似將文法侮焉顧五行錯詎畏萬物
覩欲扣九門陳恨身無鳥羽

偶書寄蘇子美

君詩壯且奇君筆正復妙二者世共寶一得亦難料我
今或盈軸體逸思亦峭有如秋空鷹氣壓城雀鷄又如
飲巨鍾一舉不能醕既醕心已醉顛倒視兩曜吾交有
永叔勁正語多要嘗評吾二人放檢不同調其於文字
間苦硬與惡少雖然趣尚殊握手幸相笑

月下懷裴如晦宋中道

九陌無人行寒月淨如水洗然天宇空玉井東南起我

馬卧我庭帖帖垂頸耳霜花滿黑鬣安欲致千里我僕
寢我廐相背肖兩己夜深忽驚魘呼若中流矢是時興
我懷顧影行月底唯影與月光舉止無猜毀吾交有裴
宋心意月影比尋常同語默肯問世俗子

飲劉原甫家原甫懷二古錢勸酒其一齊之大刀
長五寸半其一王莽時金錯刀長二寸半

主人勸客飲勸客無天妍欲出古時物先謂射以年我
料孔子履久化武庫烟固知陶氏梭飛來風雨天世無

軒轅鏡百怪爭後先復聞豐城劍已入平津淵聊讐二
百載儻有書畫傳嗚呼纔十一便言傾觥船探懷發二
寶太公新室錢獨行齊大刀鐮形末環連文存半辨齊
背有摸法圓次觀金錯刀一刀直五千其文如此精銅不蠹
蝕肉好鈎婉全為君舉酒盡跨馬月娟娟

再同江鄰幾陳和叔學士集劉舍人宅觀白鵬孔
雀鳬鼎周亞夫印鈿玉寶赫連勃勃龍雀刀

主人鳳凰池二客天祿閣共來東軒飲高論雜諧謔南

籠養白鵬北籠養孔雀素質水紋纖翠毛金縷薄大誇
鳬柄鼎不比龍頭杓玉印傳條侯字辨亞與惡鈿劍刻
辟邪符寶殊制作未觀赫連刀龍雀鑄銀鏐每出一物
玩必勸衆賓酌又令三雲髻行酒何倬約固非世俗驩
自得閱古樂聖賢泯泯去安有不死藥竟知不免此焉
用強檢縛開目即是今轉目已成昨歸時見月上酒醒
見月落恍然如夢寐前語誠不錯

韻語答永叔內翰

世人作肥字正如論饅頭厚皮雖然佳俗物已可羞字
法歎中絕今將五十秋近日稍稍貴追蹤慕前流曾未
三數人得與古昔儔古人皆能書獨其賢者留後世不
推此但務於書求不知前日工隨紙泯已休顏書苟不
佳世豈不寶收設如楊凝式言且直節修又若李廷中
清慎實罕侔乃知愛其書兼取為人優豈書能存久賢
哲人焉庾非賢必能此惟賢乃為尤其餘皆泯泯死去
同馬牛太尹歐陽公昨日喜疾瘳信筆寫此語語可忘

病憂黃昏走小校寄我東郭陬綴之輒成篇聊以助吟
謳

諭鳥

百鳥共戴鳳惟欲鳳德昌願鳳得其輔咨爾孰可當百
鳥告兩間惟鳥最靈長乃呼鳥與鵠將政庶鳥康鳥時
來佐鳳署置且非良咸用所附已欲同助翱翔以鷺代
鴻雁傳書識暄涼鸛鵲代鸚鵡剥舌說語詳禿鶻代老
鶴乘軒事昂藏野鶻代雄雞爪觜稱擅場雀豹代鷗鷖

搏擊肅秋霜。蝙蝠常入幕。捕蚊夜何忙。老鷗啄臭腐。盤
飛使游揚。鵲鷗與梟鵬。待以為非常。一朝百鳥厭。讒鳥
出遠方。烏伎亦止此。不敢戀鳳傍。養子頗似父。又貪噪
豺狼。為烏鳥不伏。獸有為爾戕。莫如且斂翮。休用苦不
量。吉凶豈自了。人事亦交相。

初冬夜坐憶桐城山行

我昔吏桐鄉。窮山屐屢躡。路險獨後來。心危常自怯。下
顧雲容容。前溪未可涉。半崖風颯然。驚鳥爭墮葉。脩蔓

不知名丹實圻在英林端野鼠飛緣挽一何捷馬行聞
虎氣豎耳鼻息歛遂投山家宿駭汗衣尚浹歸來撫童
僕前事語妻妾吾妻常有言艱勤壯時業安慕終日間
笑媚看婦靨自是甘努力于今無所懾老大官雖暇失
偶淚滿曉書之空自知城上鼓三疊

寄歐陽永叔滁州

昔讀韋公集固多滁州詞爛熳寫風土下上窮幽奇君
今得此郡名與前人馳君才比江海浩浩觀無涯下筆

猶高帆十幅美滿吹一舉一千里只在頃刻時尋常行
舟艫傍岸撐牽疲有才苟如此但恨不勇為仲尼著春
秋貶骨嘗苦咎後世各有史善惡亦不遺君能切體類
鏡照嫫與施直辭鬼膽懼微文姦魄悲不書兒女書不
作風月詩唯存先王法好醜無使疑安求一時譽當期
千載知此外有甘脆可以奉親慈山蔬采筍蕨野膳獵
麇麋鱸膾古來美臯鹵今且推夏果亦瑣細一一舊頗
窺圓尖剝水實青紅摘林枝又足供宴樂聊與子所宜

慎勿思北來我言非狂癡洗慮當以淨洗垢當以腊此
語同飲食遠寄入君脾

和王仲儀詠癭二十韻

汝水出山險汝民多病癭或如雞精滿或如猿嘽並女
慚高掩襟男大濶裁領飲水擬注壺吐詞侔有鯁樗里
既已聞杜預亦不幸秦人號智囊吳瓠繫狗頸臙臙常
住頤伶仃安及脛只欲仰問天無由俯窺井挾帶歲月
深冒犯風霜冷厭惡雖自知剖割且誰肯不唯羞把鏡

仍亦愁弔影內燎煩羊羴外砭費針穎在木曰楠榴刻
之可為皿此誠無所用既有何能辟音屏膨脝側無首臃
腫異臚頂難將面目施可與胎胞逞賢哉臨汝守世德
調金鼎氓俗雖醜乖教今日修整風土恐隨遷晨昏憂
屢省儻欲便慈顏名城不難請

憶將渡揚子江

月暈知天風舟人夜相語平明好挂帆白浪須出浦此
身猶在吳歸夢預到楚今日念同來吾妻已為土

鴨雛

春鴨日浮波羽冷難伏卵嘗因雞抱時託以雞窠暖三
旬卵既坼羽毛寒脰短雞寧辨其雛翅擁情欸欸一日
向水涯所稟殊未斷泛然去中流雞呼心憲憲人之苟
異懷負義不足算有志在毓養勿論報德限

答宣城張主簿遺鴉山茶次其韻

昔觀唐人詩茶詠鴉山嘉鴉銜茶子生遂同山名鴉重
以初槍旗采之穿烟霞江南雖盛產處處無此茶纖嫩

如雀舌煎烹比露芽競收青弱焙不重瀝酒紗顧渚亦
頗近蒙頂來以遐雙井鷹掇爪建溪春剝葩日鑄弄香
美天目猶稻麻吳人與越人各各相關夸傳買費金帛
愛貪無夷華甘苦不一致精麤還有差至珍非貴多為
贈勿言些如何煩縣僚忽遺及我家雪貯雙砂甌詩琢
無玉瑕文字撿怪奇難於抱長蛇明珠滿紙上剩畜不
為奢玩久手生胝窺久眼生花嘗聞茗消肉應亦可破
寂飲啜氣覺清賞重歎復嗟歎既不足吟誦又豈加

我今實強為君莫笑我耶

得雷太簡自製蒙頂茶

陸羽舊茶經一意重蒙頂以來唯建溪團片敵湯餅顧
渚及陽羨又復下越茗近來江國人鷹爪誇雙井凡今
天下品非此不覽省蜀蒔久無味聲名謾馳騁因雷與
改造帶露摘牙頰自煮至揉焙入碾只俄頃湯嫩乳花
浮香新舌甘永初分翰林公豈數博士冷醉來不知惜
悔許已向醒重思朋友義果決在勇猛倏然乃以贈蠟

囊收細梗吁嗟茗與鞭二物誠不幸我貧事事無得之
似贅癭

堪澗畫夢

誰謂死無知每出輒來夢豈其憂在途似亦會相送初
看不異昔及寤始悲痛人間轉面非清魂歿猶共

靈樹鋪夕夢

畫夢同坐隅夕夢立我左自置五色絲色透縑囊過意
在留補綴恐衣或綻破歿仍憂我身使存心得墮

武陵行

生事在漁樵所居亦烟水野艇一竿絲朝朝狎清泚忽
自傍藤陰乘流轉山觜始覺景氣佳潛通小谿裏常時
不見春入谷驚花藥幽興窮綠波翫芳心莫已花外一
峰明林間碧洞啟遙聞雞犬音漸悟人烟邇

挾彈篇

長安細侯年尚少獨出春郊不須曉手持拓彈灞陵邊
豈惜金丸射飛鳥金丸射盡飛鳥空解衣市酒向新豐

醉倒銀餅方肯去去卧紅樓歌吹中不管花開與花老
明朝還去杜城東

使風

跨下橋南逆水風十幅蒲帆彎若弓淮波帶日魚鱗紅
岌岌飛上北斗中龜山始撞人定鐘岸草澁澁鳴秋蟲
余居御橋南夜聞妖鳥鳴倣昌黎體

都城夜半陰雲黑忽聞轉轂聲呶呶嘗憶楚鄉有妖鳥
一月九首如贅疣或時月暗過閭里緩音低語若有求

小兒藏頭婦滅火閉門雞犬不爾留我問楚俗何苦爾
云是鬼車載鬼遊鬼車載鬼奚所及抽人之筋繫車軸
昔聽此言未能信欲訪上天終無由今來中土百物正
安能遂與南方儔上帝因風如可達願令驅逐出九州

永叔寄澄心堂紙二幅

昨朝人自東郡來古紙兩軸絨滕開滑如春冰密如繭
把玩驚喜心徘徊蜀箋脆蠹不禁久刻楮薄輒還可咍
書言寄去當寶惜慎勿亂與人剪裁江南李氏有國日

百金不許市一枚澄心堂中惟此物靜几鋪寫無塵埃
當時國破何所有帑藏空竭生莓苔但存圖書及此紙
輦入都府非珍瓏于今已踰六十載弃置大屋墻角堆
幅狹不堪作詔命聊備麤使供鸞臺鸞臺天官或好事
持歸祕惜何嫌猜君今轉遺重增愧無君筆札無君才
心煩收拾乏匱櫃日畏撻裂防嬰孩不忍揮毫徒有思
依依還起子山哀

同蔡君謨江鄰幾觀宋中道書畫

君謨善書能別書宣獻家藏天下無宣獻既沒二子立
漆匣甲乙收盈厨鍾王真蹟尚可覩歐褚遺墨非因模
開元大厯名流夥一一手澤存有餘行草楷正大小異
點畫勁婉精神殊坐中鄰幾素近視最辨纖悉時驚吁
逡巡蔡侯得所得索硯鋪紙纔須臾一掃一幅太快捷
檀溪躍過瘦的盧觀書已畢復觀畫數軸吳江種稻圖
稻苗秧秧水拍拍羣鷺矯翼人荷鋤陂塍高下石籠密
竹樹參倚荆籬疎大車立輪轉流急小犢欺顧稚子驅

令人頗有故鄉念春事況及蠶桑初虎頭將軍畫列女
二十餘子掎袞裾許穆夫人尤窈窕因誦載馳誠起予
余無書性無田區美人雖見身老癯舉頭事事不稱意
不如倒盡君酒壺

觀何君寶畫

燕馬易畫吳牛難圖馬骨應細牛骨麤馬毛要密牛毛
疎麤疎必辨別細密多模糊乃知戴嵩筆能出韓幹徒
韓馬精神在韉勒嵩牛怒鬬無牽拘昨日何家觀小軸

絹雖破爛色不渝二頭相觸角競犄前脚如跪後脚舒
尾株搨直脊脅感筋力寫盡蹄腕殊一勝一敗又苦似
勝者狠逐敗者趨卷窮赤印置小字置字乃是陶尚書
尚書國初人愛畫收幾厨買時不惜金與帛帛載羊車
錢載驢後世兒孫不能保賣入窮市無須臾凡目矜新
不重故千錢酬直皆笑愚四牛遂為何氏有裝背人眼
天下無坐中吾儕趣已異又喜玄女傳兵符此本實稱
閻令畫下筆簡細容顏殊三人鬼狀一牛首八女二十

美丈夫黃帝中間陰葩蓋霞肩錯玳旌擁朱冠服難知
歲月遠但見儀衛森清都復觀鹿臺獨夫受妲己不笑
何由娛酒池肉林騎行炙剖心斲脛堪悲吁數幅吳王
宴西子綵舟張樂當姑蘇宮娥數百族高下鬢髻一一
紅芙蓉危峰細浪得平遠前對洞庭傍大湖商紂夫差
可垂誠歷世傳玩參盤盂雕鷹草木不足記特詠此事
心何如

觀楊之美畫

天官乘車建朱旗赤幡前亞風卷披二龍緩駕蒼髯垂
印箱傍挈文籍隨雙驂推輓如畏遲行從冠服多威儀
水官自有真龍騎兩佐並跨鯨尾螭步趨羣吏怪眼眉
雲生海面無端涯雷部處上相與期人身獸爪負鼓馳
後有同類挾且槌次執電鏡風囊吹青蛇有角魚足鬚
上下引導神所施地官既失不可知此畫傳是闕令為
設色鮮潤筆法奇絹理滑膩雞子皮吳生龍王多裂墮
八軸展玩忘晨炊李成山水曉景移黃荃花竹崔擁枝

韓幹馬本模榻時神駿都失存毫釐日高腹枵眼眈眈
邂逅獲見何言疲厚謝主翁意不衰他日飽目看無遺
和江鄰幾景德寺避暑

埤蟻不應雨鳴鳶不生風鬱氣若甑炊初陽如火紅裸
膚汗交流腠體膏將鎔龍頭費挹酌犢鼻彊遮蒙常畏
俗物來去避青蓮宮廣堂鋪琉璃高簷蔭梧桐廊壁畫
地獄獄具鑊鋸舂鐵城何焰焰鐵牀亦彤彤誰知炮烙
死活間傳自西域黃面翁正類人世苦此熱聲利役使

亡西東京師貴貨幾椽舍窮煎相似聒欲聾屋頭朝爨
作飲食枕底夕艾驅蚊蟲宜爾近巷江夫子賦詩特壓
塵土中

蔡君謨示古大弩牙

黃銅弩牙金錯花銀闌線齒如排沙上立準度可省括
箭溝三道前直窠其度四寸寸五刻釜光歷歷無纖差
蔡侯出此問誰得往年客遺來瑯琊瑯琊築城穿厚壤
既獲磨洗爭傳誇莫知歲月孰製作精妙近世應難加

發機高下在分刻今人妄射功仍賒願侯擬之起新法
勿使邊兵死似麻

許生南歸

大盤小盤堆明珠海估眩目迷精麤斗量入貢由掇拾
未必一一疵類無不貢亦自有光價此等固知魚目殊
許生懷文頗所似暫抑安用頻增吁倚門老母應日望
霜前稻熟春紅桴歸來爛炊多釀酒洗蕩幽憤傾盆盃
九卿有命不愁晚朱邑當年是嗇夫

二十四日江鄰幾邀觀三館書畫錄其所見

五月秘府始暴書一日江君來約予世間難有古畫筆
可往共觀臨石渠我時跨馬冒熱去開厨發匣鳴鑰魚
義獻墨迹十一卷水玉作軸光疏疏最奇小楷樂毅論
永和題尾付官奴又看四本絕品畫戴嵩吳牛望青蕪
李成寒林樹半枯黃荃工妙白兔圖不知名姓貌人物
二公對奕旁觀俱黃金錯鏤為投壺粉障復畫一病夫
後有女子執巾裾牀前紅毯平圍爐牀上二姝展氍毹

繞牀屏風山有無畫中見畫三重鋪此幅巧甚意思殊
孰真孰假丹青模世事若此還可吁

和歐陽永叔啼鳥十八韻

南方窮山多野鳥百種巧舌乘春鳴深林參天不見日
滿壑呼嘯誰識名但依音響得其字因與爾雅殊形聲
我昔曾有禽言詩粗究一二啼喙情苦竹岡頭泥滑滑
君時最賞趣向精餘篇亦各有思致恨未與盡衆鳥評
君今山郡日無事靜聽鳥語如交爭提壺相與來勸飲

戴勝亦助能勸耕我念此鳥頗有益如欲使君勤以行
勸耕幸且彊職事勸飲亦冀無獨醒杜鵑蜀魄哭歸去
小人懷土慎勿聽城頭春鳩自謂拙鵲巢輒處安得平
高巢喬木美毛羽哢吭葉底無如鶯口中調簧定何益
下啄蚯蚓孰曰清自餘多類不足數一一推本煩神靈
我居中土別無鳥老鴉鸛鵒方縱橫教雛呌噪日羣集
豈有勸酒花下傾願君切莫厭啼鳥啼鳥於君無所營
途中寄上尚書晏相公二十韻

驚颺入林鴉亂飛舞空落葉相追隨秋權摧物不見跡
但使萬古生慈悲登山臨水昔感別身作旅人安得宜
單舟匹婦更無婢朝餐每愧婦親炊平生獨以文字樂
曾未敢恥貧賤為官雖寸進實過分名姓已被賢者知
疎愚生不謁豪貴守此退縮行將衰潁州相公秉道德
一見不以論高卑久調元化費精力猶且未倦刪書詩
唐之文章別蕪穢纖悉寧有差毫釐謂其耽學可與語
便語淵奧祛俚疑浮言近意不歷口直欲海窟拏蛟螭

再拜膝前荷勤誨垂索捆載歸忘饑解艇水驛無幾舍
新詩又遣牙兵持上言行李覽物景聊可與婦陳酒卮
下言狂斐頗及古陶韋比格吾不私相公貴且事翰墨
我輩豈得專遊嬉今將蒿芹薦俎豆定亦不以微薄遺
常令有詠無巨細當因川陸舟車貽日對順流思疾置
老魚姦怯潛鱗鬻

覽此詩為
之慨然

晏公全集二百餘卷明嘉靖時嚴
分宜家尚有之後竟不可得見矣

送方進士遊廬山

長風沙浪屋許大羅剎石齒水下排歷此二險過湓浦
始見瀑布縣蒼崖繫舟上岸入松徑三日踏穿新蠟鞋
路盤深谷出嶺望後山日照前山靄偶逢風雨恐衣濕
側倚石脇人相乖雨收不覺在高處卻見童僕提攜偕
水聲不絕鳥聲好藥草香氣侵人懷老僧避俗去足跣
野客就澗開門闢樹崑隱映見寺剎層層杳杳躋雲階
塢田將穫鳥雀橫秋果正熟猿猴齕東林淡蘂應似舊
唯此足以待爾儕子心灑落撒然往我方塵垢難磨揩

秋雨篇

秋雨一向不解休連昏接晨終窮秋梅生不量仰天問
神官夜夢言語周日月是天之兩目忽然生醫無藥瘳
只知淚滴為赤子赤子豈悟天公憂天公哭霽霽灑涕
落九州地祇不敢安泥潦已沒頭乃因從容詰神官后
稷今在帝所不從前后稷知稼穡曾以筋力親田疇曷
不告帝且輟泣九穀正熟容其收蚤時不泣此時泣憂
民欲活反扼喉神官發怒髭奮虬下土小臣安預謀恐

然驚覺汗交流樹上已聽呼雌鳩

和吳冲卿學士石屏

吳夫子佩銀龜乘天馬素怪奇忽得號畧一片石其中
白色圓如規又有樹與烏畫手雖妙何能為吳乃持問
歐陽公比公曩獲猶可疑疑不為辨賦以詩詩辭粲粲
明星垂復遣賁來使我和坐上鉅公傍睨之范侯實有
揚雄學咸云此理難究推我歸滌慮反覆思義雖不經
聊解頤月與太陽合朔時陽鳥飛上桂樹枝枝上作窠

生羣兒人不知天公天公欲俾世間見影著石面如粘
繭烏既不得去月亦不可移留為千古作好玩慎勿傾

撲同玉碑

時在唐書局與歐陽永叔王
元叔范景仁會食得所示詩

莫登樓


莫登樓脚力雖健勞雙眸下見紛紛馬與牛馬矜鞍轡
牛服輶露臺歌吹聲不休腰鼓百面紅臂構先打六么
後梁州棚簾夾道多天柔鮮衣壯僕僮髭虬寶過呵叱
倚王侯夸妍鬪艷目已偷天寒酒醺誰爾併倚檻心往

形獨留有此光景無能游粉署深沉空翠幃青綾被冷
風颼颼懷抱既如此何須望樓頭

高車再過謝永叔內翰

世人重貴不重舊重舊今在歐陽公昨朝喜我都門入
高車臨岸進船篷俯躬拜我禮愈下騶從竊語音微通
我公聲名壓朝右何厚於此瘦老翁笑言啞啞似平昔
妻子信說如梁鴻自茲連雨泥沒脛未得謁帝明光宮
冒陰履溼就稅地親賓未過知巷窮復聞傳呼公又至

黃金絡馬聲
瓏瓏紫袍寶帶照屋室
飲水啜茗當清風
邀以新詩出古律
霜髯屢頷搖寒松
因嗟近代貴莫比
官為司空仍侍中
今成冢丘已寂寞
文字豈得留無窮
以此易彼可勿媿
浮榮有若送雨虹
須臾斷滅不復見
唯有明月常當空
況我學不為買祿
直欲到死攀軻雄
一飯足以飽我腹
一衣足以飾我躬
老雖得職不足顯
願與公去驩樂同
驩樂同治田園潁水東



宋元詩會卷十三

欽定四庫全書

集部

宋元詩會卷十四

詳校官中書臣陸 湘

主事銜臣徐以坤覆勘

總校官知縣臣繆 琪

校對官中書臣牛稔文

謄錄監生臣黃 鑫

欽定四庫全書

宋元詩會卷十四

兵部主事陳焯編

梅堯臣

下

同尹子漸王幾道訪郭三別墅不遇

秋野已成曠偶然幽興多
茨居隔寒水柴戶陰喬柯
看竹曾留鳳攜朋不為鵝
人歸碧苔徑應識屐痕過

送環州通判張殿丞亢

欲向蕭關外窮陰雪暗沙磧寒鴻雁少冰合水泉賒自
有從軍樂應無去國嗟春風曾不到吹角寄梅花

新秋雨夜西齋文會

夜色際陰霾燈青謝客齋梧桐生靜思絡緯動秋懷小
酌寧辭醉清言不厭諧誰憐何水部吟苦怨空階

送弟良臣歸宣城

喬木句溪邊秋光幾曲連將歸三畝宅遠寄下江船伴
爾惟征雁悲余有暮蟬親朋如見問貧外似當年

鄭戡及第東歸後赴洋州幕

卻生方得桂王粲始從戎一舸辭吳會單車入漢中
亂山雲木古側徑野泉通欲識風烟美心知故國同

明州推官鄭先輩

應幕海邊郡秋風千里歸隨潮吳榜駛轉浦楚山微
野橘霜前熟江螯露下肥還家候靈鵲人想罷鳴機

僧可真東歸因謁范蘇州

仲淹

姑蘇臺畔去雲壑付清機野策過寒水山童護衲衣松

門正投宿竹笠帶餘暉誰愛杼山句使君應姓韋

廖秀才歸衡山縣

千里倦為客秋歸烏榜輕過林湘橘暗收潦楚江清晚
泊親鷗鷺殘芳襲杜蘅長沙幾日到天際見高城

池州進士陳君惠然見過不日且行因以詩贈別
呼童具雞黍頗識故人期竹館忽停駕山樽聊解頤醉
歌返北郭春雨生東陂便與千峰隔登高空復思

春陰

濃淡雲無定，淒微氣宇寒。
鳩鳴桑葉吐，村暗杏花殘。
客子行裘薄，春塘野水寬。
輕雷欣已發，謬作採茶官。

訪礦坑老僧

山深無外事，日夕愛潺湲。
趺坐樹間石，力畊谿上田。
解言南國事，能詠碧雲篇。
莫貴遠公酒，深慚陶令賢。

詠官妓從人

少為輕薄誤，失行落優倡。
去作小家婦，願同貧里裝。
無心歌子夜，有意學流黃。
他日東郊上，誰人見採桑。

送蔡侍禁赴長沙

寒葉下瀟湘之官逐雁行水經菱浦晚船過橘洲香二
女竹林外三閭楓葉傍平時息戎律物景助才章

送余駕部江州

內史九江行潦收波已清何時鷁舟上遠見爐峰迎野
色連葭蒹秋香薦橘橙寒潮如特送不肯過湓城

送張秀才之淮南

聊為楚客唱一送淮南行出汴遠心喜移舟孤岫橫危

帆將進浦寒霧不分城枚乘舊居處向來秋草生

送李康伯赴武當都監

城下漢江流滄波照鬢秋山川包楚塞風物似荊州試
聽清砧發何如畫角愁遙知絕戎事水味別槎頭

登許昌城望西湖

試望許西偏湖光浸曉烟岸痕添宿雨草色際平田夏
木陰猶薄朱荷出未圓人間綠波靜幽鷺揷頭眠

赴雪任君有詩相送仍懷舊賞因次其韻

湖山饒處曾省收之遊雁落封田濶船過菱渚秋野
烟昏古寺波影動危樓到日尋題墨多應舊壁留

送劉比部

青山夜來雨溪水已潺湲侵曉桂旗動傷離頻渚前百
壺臨祖道兩槳破春烟舊業西河上歸心落日邊

擬張九齡詠燕

眇眇飛來燕長年與社違任從新厯改只向舊巢歸永
日當人語輕寒逆雨飛自親文杏慣不識海鷗機

送徐君章秘丞知梁山軍

蒼壁東江流孤軍水上頭
蛟龍驚鼓角雲霧裛衣裘
午市巴姑集危灘楚客愁
使君才筆健當似白忠州

十三日雪後晚過天漢橋堤上行

堤上殘風雪橋邊盛酒樓
據鞍衰意盡倚檻艷歌留
海月開金鑑河冰卧玉虬
當年洛陽醉偏憶董糟丘

送李閣使知冀州

騾褭黃金絡春風北渡河
將軍守漢法壯士發燕歌
綠

水塘蒲短晴天塞雁多家聲復年少矍鑠笑廉頗

與道損仲文子華陪泛西湖

冰消湖已綠渺渺鴨頭春船學吳兒刺吟希楚老新對
山憐去鳥隔樹識遊人誰念滄江上風柔採白蘋

送陶太博通判廣信軍

平時易水頭不復起邊愁壯士去已久寒波空自流臨
塘遺鷺羽隔戍見羶裘半似江南美軍和賸宴游

與夏侯繹張唐民遊蜀岡大明寺

秋葉已多蠹古原看更荒廢城無馬入破冢有狐藏寒
日稍清迴羣山分潸蒼田衣指白水此下是雷塘

泊淮上

清淮渺然去白浪勢如奔同發已先遠獨行將向昏洲
長寧辨路夜泊偶依村稍覺燈光亂應聞人語喧

宣州雜詩

昭亭萬仞山古廟半山間賽雨使君去釣潭漁父閒巖
肥巖向日竹暗壠連關北望高樓上南飛鳥自還

覽顯忠上人詩

昔讀遠公傳頗聞高行僧
廬山將欲雪瀑布結成冰
尋迹數百載歷危千萬層
師來笑賈島只解詠嘉陵

和才叔岸傍古廟

樹老垂纓亂祠荒向水開
偶人經雨踏古屋為風摧
野鳥棲塵坐漁郎奠竹杯
欲傳山鬼曲無奈楚辭哀

和元興遊春韻

乘閒多遠興信馬與君行
碧樹斜通市清流曲抱城
山

花高下色春鳥短長聲日暮吾廬近還歌空復情

離蕪湖至觀頭橋

江口泊來久長蒲長舊苗爭雛洲鵲鬪遺子浦魚跳宿
岸欣逢戍歸船競趁潮時時望鄉樹已恨白雲遙

送馬廷評之餘姚

越鄉知勝楚君去莫辭遙曉日魚鰕市新霜橘柚橋河
流通海道山井應江潮近邑逢鷗鳥先應避畫橈

送張子野祕丞知鹿邑

忽作五年別相逢雙鬢疎不知從此去當見復何如公
秣時為酒晨庖日有魚沛譙風物美聊以樂琴書

送何遜山人歸蜀

春風入樹綠童稚望柴扉遠壑杜鵑響前山蜀客歸到
家逢社燕下馬澣征衣終日自臨水應知已息機

魯山山行

適與野情愜千山高復低好峰隨處改幽徑獨行迷霜
落熊升樹林空鹿飲溪人家在何許雲外一聲雞

舟次朱家曲寄許下故人

藹藹桑柘岸
喧喧雞犬村
晚雲連雨黑
秋水帶沙渾
稍聽鄰船語
初分異土言
雖嗟遠朋友
日喜近田園

送崔主簿赴睦州清溪

舟輕不畏險
逆上子陵灘
七里峽天翠
千重雲水寒
古祠鳴野鳥
亂石激春湍
正與高懷愜
寧歌行路難

辛著作知西京永寧

躍馬西畿令
家瑩在洛陽
衣霑寒食雨
花發故宮牆
冷

淡鳩鳴屋寬間水滿塘送君悲漸老空憶釣伊魴

十五日雪 二首

寒令奪春令六花侵百花塘冰膠燕觜野水澁芹牙擁
柱輕於絮吹墀淨若沙乳禽饑啄木誰誤撥琵琶

新雷奮蛇甲密雪鬪鵝毛正欲裁輕縠重令著敝袍沙
泉流復凍烟萼圻還韜只待鄰醅熟微聲聽酒槽

送番禺杜主簿

行識枕榔樹初窺翡翠巢地蒸蠻雨接山潤海雲交訟

少通華語蟲多人膳庖不須思朔雪梅吐臘前梢

春寒

春晝自陰陰雲陰薄更深蝶寒方斂翅花冷不開心亞
樹青帘動依山片雨臨未嘗辜景物多病不能尋

洛陽牡丹

古來多貴色歿去定何歸清魄不應散艷花還所依紅
樓金谷妓黃值洛川妃朱紫亦皆附可言人世稀

古鏡

古鏡得荒塚土花全未磨背菱尖尚在鼻獸角微訛月
暗蝦蟇蝕塵昏魍魎過但令光彩發表裏是山河

岸貧

無能事耕穫亦不有雞豚燒蚌暇搓沫織蓑依樹根野
蘆編作室青蔓與為門稚子將荷葉還充犢鼻褌

村豪

日擊收田鼓時稱大有年爛傾新釀酒包載下江船女
髻銀釵滿童袍毳氍鮮里胥休借問不信有官權

顏公遺碧霄峰茗

到山春已晚何更有新茶峰頂應多雨天寒始發芽採
時林狖靜蒸處石泉嘉持作衣囊祕分來五柳家

蚤發大信口

犬吠知船解村墟尚閉門霜泥粘纜尾冰水閣潮痕撇
撇鷓鴣去纖纖蚱蜢昏梅湖到不遠寄信向田園

閒居

讀易忘饑倦東牕盡日開庭花昏自斂野蝶晝還來謾

數過籬筍遙窺隔葉梅惟愁車馬入門外起塵埃

將赴表臣會呈杜挺之

莫怪去遲遲予心君亦知膝前嬌小女眼底寧馨兒學語渠渠問牽裳步步隨出門雖不遠情愛未能移

哭孫明復殿丞

自古春秋學皆知不可過生前恩禮少歿後薦章多妻子將焉託田園有幾何汶陽秋樹裏黃鳥謾聽歌

歐陽寺丞桐城宰

葉落淮南樹青山徧馬頭人烟將近郭松竹不知秋夜
虎林間嘯溪泉舍下流門前仲卿廟遺跡待君求

寺丞

宰桐見梅詩諒非凡品而
邑乘不載其姓名惜哉

餘姚令陳寺丞

試邑來勾越風烟復上游江湖自迎客山月亦隨舟海
貨通閭市漁歌入縣樓絃琴無外事坐見浦帆收

任適尉烏程

俛作程鄉尉折腰還自甘弁峰晴照黛雲水曉澄藍葑

上春田闢蘆中走吏參到時蘋葉長柳惺蓋江南

金山寺

吳客獨來後楚橈歸夕曛山形無地接寺界與波分巢
鶻寧窺物馴鷗自作羣老僧忘歲月石上看江雲

依韻和武平九月十五日夜北樓望太湖

東吳臨海若看月上青冥河漢微分練星辰淡布瑩細
烟沉遠水重露裛空庭孤坐饒清興惟將影對形

送余中舍知漢州德陽

匹馬易為秣單車長是輕秋風來棧道宿雨度關城石
上樹林暗山根江水明桐花鳳何似歸日為將行

送鮮于祕丞先通判黔州

壺頭山下俗巴婦曲中聽汲井熬鹽白燒田種穀青巖
風來虎嘯江雨過龍腥事簡能談者揚雄所草經

送河清賈主簿歸任

不遠水雲間悠悠沂鵲還分亭接雞犬舉酒對河山殘
雪依荒磧寒烟入暝灣昔人鸞枳歎一併在離顏

新霽望岌笠山

謝紫微坐中賦

北望直百里峩峩千仞青
斷虹迎日盡飛雨帶龍腥
陰壑烟雲畜陽崖草木靈
登臨終不厭時許到茲亭

魏屯田知楚州

淮南木葉驚淮上使君行
天外高帆出沙頭候吏迎
夜潮通廢埭秋月滿孤城
正遲文翁化從來楚俗輕

田家

高樹蔭柴扉青苔照落暉
荷鋤山月上尋徑野烟微
老

叟扶童望羸牛帶犢歸燈前飯何有白薤露中肥

悼亡

每出身如夢逢人強意多歸來仍寂寞欲語向誰何
冷孤螢入宵長一雁過世間無最苦精爽此銷磨

送臨江軍監酒李太博

三江卑濕地北客宦遊稀霧氣多成雨雲蒸易損衣
白醪燒甕美黃雀下田肥未辨殊方語山歌半是非

除夜雪

擊鼓人驅鬼漫天雪送寒臘從今日盡花作舊年看著
樹多還墮隨風葉更乾明朝預王會畏溼兩梁冠

同諸韓及孫曼叔晚遊西湖

晚日城頭落輕鞍果下涼野蜂銜水沫舟子剥菱黃木
老識秋氣徑幽聞草香幅巾聊去檢不作楚人狂

夢後寄歐陽永叔

不趁常參久安眠向舊溪五更千里夢殘月一城雞適
往言猶是浮生理可齊山王今已貴肯聽竹禽啼

夏日晚霽與崔子登周襄故城

雨脚收不盡斜陽半古城獨攜幽客步閒閱老農耕寶
氣無人發陰蟲入夜鳴余非避喧者坐愛遠風清

題松林院

靜邃無塵地青熒續燭燈木魚傳飯鼓山衲見歸僧野
色寒多霧溪痕夜閣冰吾非謝康樂獨往亦何能

郡閣閱書投壺和呈相國晏公

較量人世無窮樂羅列平生未見書聊奉投壺祭征虜

休言擊劍馬相如畫樓晚去聞寒角
縹帙春來落蠹魚
日奉誨言猶未飽不慙貧賤帶經鋤

依韻和秋夜對月

陳王苑裏望空虛吳客風前憶具區
橫閣漸看河影轉
繞枝還見鵲驚無蟲催織婦機成
素露逼鮫人淚作珠
才比陶潛無用處角巾時任酒沾濡

依韻和武平別後見寄

溪遠橋微一望遙此焉悽絕府中僚
已同雁鷺依清淺

共看鸞皇上沈寥別岸無端縈細柳迴舟不忍過新橋
醉來事事能生感誰道愁腸酒易銷

寄洪州致仕李國博

湖上悠然度幾春勇拋榮祿遂天真青蒲翠竹圍華屋
白酒黃雞命里人果下有時乘小駟兒曹方見擁朱輪
田園歲入千鍾美肯似疏家苦畏貧

送少卿張學士知洪州

朱旗畫舸一百尺五月長江水拍天穩去先應望廬岳

暫來誰復見龍泉閣經吏部重為記山識吳王舊鑄錢
往迹可尋軍事少賸書遺逸附青編

送邵郎中知潭州

長鏡疊吹洞庭外緣虎帶刀蠻帥迎且諭漢家綏撫厚
莫言湘守事權輕木奴洲近霜色熟斑竹林昏野鳥鳴
賈誼宅邊寒井在暫留千騎漱餘清

送王察推鎮之鄧州

昔向南陽憶洛陽秋橙初熟半林黃車過白水沙痕濶

雁落鉗盧稻穗長廢壘漢碑金刻字古原秦冢石為羊
太平羽檄何曾有賓主相歡菊薦觴

送石昌言學士

混混拍堤瓜蔓水軒軒銜尾桂檣船使君東下只朝夕
父老走迎無後先古堞秋耕拾銅鏃長淮暴雨入壕蓮
鳴猿舞鶴仍持去不憶承明夜直眠

送樂職方知泗州

長堤凍柳不堪折窮臘使君單騎行蘇合輕裘霜莫犯

銅牙大弩吏先迎山傍楚賈連檣泊水上禹書寒磬清
試向郡樓東北望烟波千里月臨城

和王景彞正月十四日夜有感

燈光暖熱夜催春天半樓開飲近臣馳道橫頭起山岳
露臺周匝簇車輪隔簾艷色多相照下馬輕裘各競新
我已暮年殊趣嚮濃油一盞案邊身

小村

淮濶洲多忽有村棘籬疎敗漫為門寒雞得食自呼伴

老叟無衣猶抱孫野艇鳥翹唯斷纜枯桑水齧只危根
嗟哉生計一如此繆入王民版籍論

依韻和吳正仲冬至

流年冉冉即衰遲物趣迴還似轉規長景已知今日至
孤懷不比少年時偶陪上閣鵷鷺後且與南州父老期
況有春禾新酒熟百分休放手中卮

朝

木鐸初開水上城竹籬深閉日光生青苔井畔雀兒鬪

烏白樹頭鴉舅鳴世事但知開口笑俗情休要若心行
是非不道任佻達唯憶當時阮步兵

東溪

行到東溪看水時坐臨孤嶼發船遲野鳬眠岸有閒意
老樹著花無醜枝短短蒲茸齊似翦平平沙石淨於篩
情雖不厭住不得薄暮歸來車馬疲

送吳正仲婺歸梅谿待闕

山水東陽去未去朋親苕霅朝復朝更無越相逃名舸

猶看吳王送女潮
海燕歸齊聲滿屋
谿梅開過子生條
明年十月吏迎處
七里灘前擢秦簫

和孫都官河上春望

河上風烟愛此邦
吳艘越舸不相降
魚腥蠹蠹橋邊市
花暗深深竹裏牕
蹴踘漸知寒食近
鞦韆將立小鬟雙
年光取次須偷賞
何用功名節與幢

重送周都官

水上朱樓戍角鳴
濛濛雨裏榜舟輕
未逢甫里先生謁

多見吳興太守迎荷葉半黃蓮子老霜苞微綠橘林明
十年不到風烟改君去將詩與畫評

送李戴之殿丞赴海州權務

瓜蔓水生風雨多吳船發擢唱吳歌槎從秋漢下應快
人憶故園歸奈何世事靜思同轉轂物華催老劇飛梭
茶官別有清閒味海月團團入酒嬴

和楚屯田同曾子固陸子履觀予堂前石榴花

堂下一匹鄭虔馬欄邊兩株安石榴但能有酒邀佳客

亦任狂花落素甌
俗女紅裙無好色
主人白髮自侵頭
欲歌翠樹芳條曲
已去洛陽三十秋

依韻和永叔久在病告近方赴直道懷見寄

浴堂深殿近皇居
秋夕詞臣直宿初
宮女穿針爭落月
官奴持燭看殘書
萬家乞巧心無盡
斜漢飛光望有餘
枕上江山夢猶熟
五更寒雨過簾疎

江鄰幾暫來相見去後戲寄

低頭拜我蒼髯翁
來如飛鳥去如風
一夕共飲斗柄北

平明已向函關東，衆中舊騎跛鼉馬。
塞下新買連錢驄，疾驅似逐鄧林日。
不肖暫住行何窮。

和韓欽聖學士襄陽聞喜亭

亭欄下望漢江水，淨綠無風寫鏡明。
日脚穿雲射洲影，槎頭擺子出潭聲。
檣帆落處遠鄉思，砧杵動時歸客情。
使者徘徊有佳興，高吟不減謝宣城。

送余少卿知睦州

青山峽裏桐廬郡，七里灘頭太守船。
雲霧未開藏宿鳥。

坡原將近見燒田養茶摘藥新春後種橘收包小雪前
民事蕭條官政簡家書時問雪溪邊

寄題徐都官新居假山

太湖萬穴古山骨共結峰嵐勢不孤苔徑三層平木末
河流一道接牆隅已知谷口多花藥祇欠林間落狹鼯
誰侍巾構此遊樂里中遺老肯相呼

送趙簡議知徐州及

鹿車幾兩馬幾匹軫建朱幡騎轂弓雨過短亭雲斷續

鶯啼高柳路西東
呂梁水注千尋險
大澤龍歸萬古空
莫問前朝張僕射
毬場細草綠蒙蒙

送李中舍

襲之

宰南鄭

莫問褒中道路難
襄陽直上幾重灘
蒼烟古栢漢高廟
落日荒茅韓信壇
出水槎頭一絲挂
穿虹雨脚兩橋殘
土風大抵如南國
期會先時俗自安

送馬行之都官

昭亭山下送君時
不畏西行劍戟危
竿馬跨來身更健

吳船乘去計非遲錢塘湖上尋雲屋巾子峰前種槿籬
此趣已高天下士不須功業似鴟夷

寄許主客

昨日山光寺前雨今朝邵伯堰頭風野雲不散低侵水
魚艇無依尚蓋蓬藕味初能消酒渴蓼芳猶愛照波紅
揚州有使急迴去敢此寄聲非塞鴻

聞永叔出守同州寄之

冕旒高拱元元上左右無非唯唯臣獨以至公持國法

豈將孤直犯龍鱗
萊萁欲把人留楚
首偕方枯馬入秦
訪古尋碑可銷日
秋風原上足麒麟

寄西京通判宋次道

當時交友都無幾
欲問歡娛亦異今
花接上林新木變
水分清洛舊池深
嵯峨嵩色雲常在
窈窕宮牆草又侵
修竹千竿白家寺
昔年題處可能尋

送唐紫微知蘇臺

洞庭五月水生寒
盧橘楊梅已滿盤
泰伯廟前看走馬

闔閭城下見驂鸞吳娃結束迎新守府吏趨跽拜上官
曾過揚州能慣否劉郎盞底勸須寬

右丞李相公自洛移鎮河陽

侯服齊三輔天臺聳百僚新章刻銅虎舊德冠金貂已
作歌襦化方期執玉朝雙韃辭洛宅千騎向河橋鼓角
春城暮鶯花故苑遙瓜亭猶接畛棠茆自敷條夾道都
人擁迎風四牡驕莫隨文學乘空望旆旗飄

望許昌西湖晚晴

新晴萬柳齊鶯度水東西城上明殘照雲間挂斷霓烟
蒲勻若剪沙岸淨無泥果壓繁枝重人乘小駟低嵐光
開翡翠湖色浸玻璃惹袖朱藤密如過蒼畫谿

次韻和永叔對雪

紛紛何亂日凜凜自開門著莫風難定侵凌物已繁裝
成新樹色沒盡古苔痕冷入梁王苑清乘衛國軒欺貧
凍蓬華增險怯輾轅小隙皆能及洪爐逼不溫雲衣隨
處積水甲等閒屯團戲為九轉堆雕作獸蹲豈愁穿破

履幸喜有清樽誰問諸公子高樓與後園

金明池遊

三月天池上都人袷服多水明搖碧玉岸響集靈鼉畫舸龍延尾長橋霓飲波苑花光粲粲女齒笑嗟嗟行袂相朋接游肩與踐摩津樓金間采幄殿錦交窠挈榼車傍綴歸郎馬上歌川魚應望幸幾日翠華過

送李端明知河中府

才業人終服聰明帝所聞來希段干木去識大馮君金

絡鳴津口朱旗點雁羣山河虞舊國簫鼓漢橫汾古堞
臨秋月高樓等白雲應同羊叔子緩帶隔鷺氛

代書寄歐陽永叔四十韻

始謫夷陵日當居建德年一書寃逐客四詠繼前賢自
謂臨江徼相逢莫我先白醪封畫榼素鯉養泓泉戒吏
收山栗呼童惜沼蓮只期東浦過共醉小溪邊日日占
風勢時時到水堦安知貪挂席不肖暫迴船自爾皆無
定歸歟亦未然指程幾一月源險歷三千魚鳥都難問

音塵杳莫傳因之走羸僕試與訪南遷比及過牛峽還
聞近壁田報言雖不獲吉語喜多全我解歸堯闕君移
近漢淵問途曾未遠命駕亦何緣衰野今行矣隆中有
待焉鄉亭瓜接畛風化蟻同羶即欲朋簪盍翻為俗事
牽愛嬰嬌啞啞嗜寢腹便便難忝煩為具輪輶豈得前
寄聲勤以謝幸子恕而憐來貺誠為望論情恐未捐常
親馬南郡果謁謝臨川遂得窺顏色重忻論簡編聊資
別後著大出篋中篇問傳輕何學言詩詆鄭箋飄流信

窮厄探討愈精專道舊終忘倦評文欲廢眠寧知主人
貴但見左魚懸所至同風月相歡憶澗渥清歌嗟在耳
素髮怪侵顛翠堞時登眺芳洲屢溯洄難醒撥醅醪殊
厭落頭鮮坐竹聽啼鳥臨流聒嘒蟬孤亭起歸夢南陌
去揚鞭出餞陪雙旆方靳歷廣鄺始生山吏敬頗識利
途遭會而辭何吐離膺事已填空餘郡樓望野色際平
烟

和春日偶書

甕面春醅壓嫩藍盤中鵝炙亦肥甘正宜醉夢輕為蝶
苦怕酬詩密似蠶病起羊公方隱几歸來陶令只乘籃
河堤古木欣欣暗野水新秧拍拍渾已向官資隨分足
莫將忠憤等閒談況於世上諸般厭不作人間一例貪
陋巷自知當退縮權門誰解更趨叅高低趣向難為合
冷暖情懷固飽諳免意妻兒猶苟祿強顏冠冕未抽簪
唯公恩遇留連召頻對樽罍也負慙

和禁烟述事

狂風暴雨已頻過近水棠梨著未多窈窕踏歌相把袂
輕浮賭勝各飛墻閒牽白日游絲颺細驀黃金舞帶拖
小苑芳菲花鬪藥華堂嘲哢燕爭窠西州駿馬頭如剝
南國佳人頸似瑳結客追隨傾畫榼分棚遊樂藉清莎
鞦韆競打遺鈿翠芍藥將開翦纈羅我病乞求新火炙
無心更聽打枝歌

雜詩絕句四首

蛙行動萍葉誤觀作遊魚稍稍引兩股已變科斗書

青青老鏡葉下有繁實尖浪頭撥船女刺手終不嫌
前時雙鴛鴦失鳴鳴不已今更作雙來還悲舊流水
河畔有釣翁團泥為甕缶坐想秦人聲思傾杜陵酒

七月二十一日夜聞韓玉汝宿城北馬鋪

暗樹秋風擺葉鳴桃枝竹簟冷逾清孤燈淡淡短亭客
半夜蕭蕭聞雨聲

京師逢賣梅花

二首

北土只知看杏蘂大梁亦復賣梅花此心還似庾開府

不惜金錢買取誇

驛使前時走馬迴北人初試越人梅清香莫把荼蘼比
只欠溪頭月下杯

對雪憶往歲錢塘西湖訪林逋處士

二首

昔乘野艇向湖上泊岸去尋高士初折竹壓籬曾礙過
却穿松下到茅廬

樵童野犬迎人後山葛棠梨案酒時不畏尖風吹入牖
更教牀畔覓鷗夷

黃鶯

內家初上翠微宮
樹裏窺人在半空
笑語漸高無約束
侍臣偷望向雲中

宋元詩會卷十四